

**Uunga siunnersuut: Kulturikkut ingerlatsineq sunngiffimmilu sammisassaqaartitsineq
pillugit Inatsisartut inatsisaat nr. xx, xx. xx 2016-imeersoq.**

(Ilinniartitaanermut, Kultureqarnermut, Ilisimatusarnermut Ilageeqarnermullu
Naalakkersuisoq)

aamma

**Uunga siunnersuut: Timersorneq timigissarnerlu pillugit Inatsisartut inatsisaat nr. xx,
xx. xx 2016-imeersoq.**

(Ilinniartitaanermut, Kultureqarnermut, Ilisimatusarnermut Ilageeqarnermullu
Naalakkersuisoq)

kiisalu

**Uunga siunnersuut: Eqqumiitsuliornermik ingerlatsineq pillugu Inatsisartut inatsisaat
nr. xx xx. xx 2015-imeersoq.**

(Ilinniartitaanermut, Kultureqarnermut, Ilisimatusarnermut Ilageeqarnermullu
Naalakkersuisoq)

pillugit

**Kultureqarnermut, Ilinniartitaanermut, Ilisimatusarnermut Ilageeqarnermullu
ataatsimiititaliap**

Siunnersuutit aappassanneerpeqarnerannut

ISUMALIUTISSIISSUTA

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap suliarinninnermini kingullermik ukuningga inuttaqarpoq:

Inatsisartunut ilaasortaq Vivian Motzfeldt, Siumut, siulittaasoq

Inatsisartunut ilaasortaq Peter Olsen, Inuit Ataqatigiit, siulittaasup tullia

Inatsisartunut ilaasortaq Suka K. Frederiksen, Siumut

Inatsisartunut ilaasortaq Poul Hansen, Demokraatit

Inatsisartunut ilaasortaq Mimi Karlsen, Inuit Ataqatigiit

UKA 2015-imi UKA2015/163-ip (maanna UPA2016/163) 7. oktober 2015-mi siullermeerneqarnerata kingorna, UPA 2016-imi UPA2016/116-ip 14. april 2016-imi siullermeerneqarnerata kingorna kiisalu UPA 2016-imi UPA2016/117-ip siullermeerneqarnerata kingorna ataatsimiititaliap siunnersuutit sukumiisumik misissorpai.

0. UPA2016/116, UPA2016/117 aamma UPA2016/163

UKA2015/163-ip, UPA2015/32-ip kiisalu kulturikkut ingerlatsineq aamma sunngiffimmik sammisassaqtitsineq pillugit Inatsisartut peqqussutaata nr. 10, 21. maj 2002-meersup imminnut attuumassuteqarnerat tunngavigalugu UKA2015/163-ip aappassaaneernejarnissaata pingajussaaneernejarnissaatalu UPA 2016-imut kinguartinneqarnissaa Inatsisartut Siulittaasoqarfiannut ataatsimiititaliamit qinnutigineqapoq. UKA2015-/163 (maanna UPA2016/163) aamma kultureqarneq pillugu timersornerlu pillugu inatsisissatut siunnersuutigineqartussatut naatsorsuutigineqartut ataatsimut suliariumallugit tamanna ataatsimiititaliamit kissaatigineqarpoq.

Tamanna tunngavigalugu eqqumiitsuliornermut inatsisip, kultureqarnermut sunngiffimmilu sammisassaqtitsinermet inatsisip kiisalu timersornermut timigissarnermullu inatsisip – tassa imm. 163-ip, 116-ip aamma 117-ip - ataatsimut isumaliutissiissusiuunnejarnissaat ataatsimiititaliamit toqqarneqarpoq. Ataatsimut isumaliutissiisummik suliaqarneq kulturikkut ingerlatsineq sunngiffimmilu sammisassaqtitsineq pillugit Inatsisartut peqqussutaannik nr. 10, 21. maj 2002-meersumik atorunnaarsitsinermet atatillugu isigineqassaaq.

1. Siunnersuutit imarisaat siunertaallu.

1.1 Imm. 116 – kultureqarnermut inatsit

Taaguutip “kultureqarnermut inatsisip” imm. 116-mut atatillugu isumaliutissiisummi matumani atornejarnissaa ataatsimiititaliamit toqqarneqarpoq. Taamatulli taaguusernejarnera ataatsimiititaliap siunnersuutip imarisaanik siunertaanillu paasinninneranut apeqqutaasutut isigineqassanngilaq.

Siunnersuutikkut kultureqarnerup iluani kultureqarnermi sunngiffimmilu sammisassaqtitsineq qitiutillugit nutaamik inatsisiliornissamut sinaakkusiisoqarpoq. Taamaaliornikkut kulturikkut ingerlatsineq aamma sunngiffimmik sammisassaqtitsineq pillugit Inatsisartut peqqussutaanni nr. 10, 21. maj 2002-meersumi kultureqarnermut sunngiffimmilu sammisassaqtitsinermet tunngasut atorunnaarsinniarneqarput.

Inatsisissatut siunnersuut sinaakkutitut inatsisitut isigineqarpoq, tamatumani qitiutinneqarlutik Naalakkersuisut kommunillu akornanni akisussaaffimmik agguataarineq, soorluttaaq kulturikkut aningaasaliunneqartartut arlallit pillugit piumasaqaatit erseqqissut aalajangersaavigineqarlutik. Nutaartaasq tassaavoq oqaatsit “fritidsklubbi” aamma “sunngiffimmi ornittagaq” (fritidshjem) ersarinnerusumik avissartinnejarnissaat

siunnersuutikkut siunniunneqarmat. Tamanna ilaatigut qulakkeerneqarpoq sunngiffimmi ornittakkat pillugit aalajangersakkat erseqqissut inatsisissatut siunnersuummi ilanngunneqarnerisigut.

Tamatuma saniatigut inatsisissatut siunnersuutikkut nutaanik maleruagassiortoqarpoq kommunit Naalakkersuisullu kulturikkut ingerlatanut tapiissutinik agguuassiniissaanni meeqqat inuusuttullu, aalaniarnermikkut killeqartut (pisinnaasamikkut killillit) aamma inuit inuunerlulernissamat ulorianartorsiortut isiginiarneqartarnissaannik qulakkeerinnittussanik.

1.2 Imm. 163 – Eqqumiitsuliornermut inatsit

Taaguutip “eqqumiitsuliornermut inatsisip” imm. 163-mut atatillugu isumaliutissiisummi matumani atorneqarnissaa ataatsimiititaliamit toqqarneqarpoq. Taamatulli taaguuserneqarnera ataatsimiititaliap siunnersuutip imarisaanik siunertaanillu paasinninneranut apeqqutaasutut isigineqassanngilaq.

Siunnersuutikkut matumuuna eqqumiitsuliornermut ingerlatsinerup immikkut sinaakktissaqarnissaa Naalakkersuisunit kissaatigineqarpoq. Taamaalillunilu sinaakktitut inatsisiliornissaq siunnersuutikkut siunertarineqarpoq, tassuunakkut eqqumiitsuliornermik ingerlatsinerup siuarsaanissamat kiisalu eqqumiitsuliornermik ingerlatsinerup inuttaasunut siaruarterneqarnerunissaanut Naalakkersuisut kommunillu arlalinnik periarfissinneqarlutik.

Taamatuttaaq kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaata nr. 10, 21. maj 2002-meersup nutarterneqarnerata inatsisissatut siunnersuut kinguneraa. Taamaaliornikkut siunertarineqarpoq eqqumiitsuliornermut suliaassarfiup iluani suleriaatsit pioreersut ataavartunngortinneqarnissaasa saniatigut Inatsisartut peqqussutaanni siuliani taaneqartumi aalajangersakkat attuumassuteqartut ataatsimoortinnissaat.

1.3 Imm. 117 – Timersornermut inatsit

Taaguutip “timersornermut inatsisip” imm. 117-mut atatillugu isumaliutissiisummi matumani atorneqarnissaa ataatsimiititaliamit toqqarneqarpoq. Taamatulli taaguuserneqarnera ataatsimiititaliap siunnersuutip imarisaanik siunertaanillu paasinninneranut apeqqutaasutut isigineqassanngilaq.

Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaanni nr. 10, 21. maj 2002-meersuni aalajangersakkat aalajangersimasut inatsisissatut siunnersuummi aallaavigineqarput. Tassa Inatsisartut peqqussutaanni taaneqartumi aalajangersakkat ilaat inatsisissatut siunnersuummi ingerlateqqinneqarput.

Timersoqatigiiffiit kattuffiisa pisortallu oqartussat timersornerup iluani akisussaaffii inatsisissatut siunnersuutikkut erseqqissarniarneqarsimapput. Timersornerup timigissarnerullu

nuna tamakkerlugu siuarsarneqarnissaat ilaatigut siunnersuummi siunertaavoq. Pisortat oqartussat timersoqatigiiffiillu kattuffiisa akornanni suleqatigiinnikkut tamanna qulakkeerniarneqarpoq, tamatumani siullertut taaneqartut sulinermi tassani akisussaaffimmik tigumminissamut pisussaaffilerneqarput. Timersornermik timigissarnermillu suliaqarnej nuna tamakkerlugu pissaaq, tassungalu ilanngullugu inuit immikkut pisariaqartitsisut qitiutinneqassallutik, soorluttaaq peqataanissamut aningaasatigut aporfissaasinnaasut minnerpaaffimmiitinniarneqassallutik.

Timersornermi timigissarnermilu piunassutsimik ingerlatsinermit sinaakutissatut aalajangersakkat inatsisissatut siunnersuutip imarisaani nutaartaapput.

Timersornermi unammisarnej inatsisissatut siunnersuutikkut maleruagassiorneqassasoq aamma siunnersuutigineqarpoq, tamatumani pineqarlutik inuinnaat timersortarnerat aamma unammilluni timersortarnej. Kingullertullu aalajangersakkat nakorsaatinik pissasaatinik aamma timersuutini unammineri sunniiniartarnermik akiuniarnissamik siunertallit siunnersuutigineqarput.

2. Siunnersuutit Inatsisartunit siullermeerneqarnerat kiisalu ataatsimiititaliap aallarniutigalugu suliarinninnera

2.1 Imm. 116 – Kultureqarnermut inatsit

Siullermeerrinninnermi inatsisissatut siunnersuut nalinginnaasumik taparserneqarpoq. Pissutsilli ataasiakkaat oqallisigineqarput. Taamaalilluni inatsisissatut siunnersuummi oqaatsitigut ajornartorsiutit eqqumaffigeqquneqarput. Tamatumalu saniatigut kultureqarnermut suliaqarfiup pingaaruteqarnera minnerunngitsumillu meeqqanut tunngatillugu sunngiffimmi sammisasaqartitsinerup immikkut pingaaruteqarnera ilaatigut eqqumaffigeqquneqarput. Pissutsit taakku pingaartinneqarmata siunnersuut ataatsimiititaliamut suliaannorgortinneqarpoq.

2.2 Imm. 163 – Eqqumiitsuliornermut inatsit

Siunnersuut una UKA2015-mi sullermeerneqarpoq. Tamatumani oqaaseqartartunit amerlanerussuteqartunit kissaatigineqarpoq siunnersuut aappassaaneerneqartinnagu pissutsit arlallit isumaliutigineqartariaqartut. Taamatut kissateqarnermi tusarniaanermi inatsisissatut siunnersuummut uparuateqarsimaneq erseqqissaatigineqarpoq, soorluttaaq kultureqarnermut inatsisissap aammalu eqqumiitsuliornermik ingerlatsinermit inatsisissatut siunnersuutip (eqqumiitsuliornermut inatsit) akornanni killigitassat nalornissutigineqartut.

Siunnersuut innersuussutigalugu eqqumiitsuliornermut inatsisissap matuma kiisalu UPA2015/32-ip Inatsisartunit akuerineqartup imminnut attuumassutaasa saniatigut inatsisissatut siunnersuutip matuma aammalu kultureqarnermut inatsisissap akornanni killigitassat nalornissutaasut sukumiisumik misissuiffigeqqullugit ataatsimiititaliaq

kaammattorneqarpoq. Ilanngullugulu eqqumiitsuliornermik ingerlataqarnermi aningaasaliissutit ukiunut arlalinnut siammartinneqarsinnaanerannut periarfissaq oqallisigineqarpoq.

Siuliani allassimasut tunngavigalugit siunnersuut aappassaanneerqartinnagu Kultureqarnermut, Ilinniartitaanermut, Ilisimatusarnermut, Ilageeqarnermullu Ataatsimiititaliamut suliasanngortinneqarpoq.

2.3 Imm. 117 – Timersornermut inatsit

Siullermeerinninnermi siunnersuut nalinginnaasumik tapersorsorneqarpoq. Timersorerup timigissarnerullu inuiaqatigiinni peqqissutsimut, tamat oqartussaaqataanerannut, inuuniarnermi atukkatigut assigiinngissutsinut il.il. pitsaasumik kinguneqartarnerat siunnersuutip oqallisigineqarnerata aallartinnerani tikkuarneqarput. Tamatuna saniatigut timikkut pissutsit timersorerullu ingerlanneqarnissaanut tamatuma killiliisarnera oqaatigineqarput. Nunatsinni ulluunerani paaqqinniffinni, atuarfinni ilinniaqqiffinnilu timersorerup, timigissarnerup aalanerunissallu pingaarnertinneqarnissaat partiinit arlalinnit kissaatigineqarpoq. Inatsisissatut siunnersuutip sukumiinerusumik misissorneqarnissaa siunertaralugu siunnersuut ataatsimiititaliamut suliasanngortinneqarpoq.

3. Tusarniaanermut akissutit

3.1 Imm. 116 – kultureqarnermut inatsit

Tusarniaanermut akissutitut tiguneqartut inatsisissatut siunnersuummut ilanngunneqarput, tamannalu Inatsisartut Siulittaasoqarfianit piumasaqaatigineqartunut naapertuuppoq.

Taamaattorli takuuk immikkoortoq 3.2.

3.2 Imm. 163 – eqqumiitsuliornermut inatsit

Tusarniaanermut akissutitut tiguneqartut inatsisissatut siunnersuummut ilanngunneqarput, tamannalu Inatsisartut Siulittaasoqarfianit piumasaqaatigineqartunut naapertuuppoq.

Aallarniutigalugu ataatsimiititaliamit pitsaasutut isigineqarpoq Naalakkersuisut taama amerlatigisunut assigiinngitsigisunullu tusarniaasimanagerat, soorluttaaq ataatsimiititaliamit maluginiarneqartoq inatsisissatut siunnersuut una taama annertutigisoq paasinjarlugu soqotigisallit amerlasuut nukinnik atuisimasut. Ataatsimiititaliali paasivaa tusarniaaffigineqartut arlalinnik kaammattuuteqarnerat kaammattuutit ilimanaateqarnerannik, kingunerisassaannik il.il. Naalakkersuisut aalajangersimasumik naliliinerannik kinguneqarsimanngitsut. Taarsiulluguli oqaaseqaatit Naalakkersuisunit tusaatissatut tiguneqarsimapput imaluunniit siunnersuutaqaqaartup imarisai uteqqinneqaannarsimallutik. Kaammattuutinik, siunnersuutinik il.il. annertunerusumik naliliiffiginnittaqqullugit aammalu Naalakkersuisut siunnersuummi aalajangersagaliaannut allaanerusumik isummernernik

taamatut naliliineq qanoq isumaqarfiginerlugu oqaatigisaqqullugu Naalackersuisut ataatsimiititaliamit kaammattorneqarput. Taamaalillutimmi Naalackersuisut naliliineri Naalackersuisut inatsisissatut siunnersuutaannik Inatsisartut suliaqarneranni ilaatinneqartarput.

3.3 Imm. 117 – timersornermut inatsit

Tusarniaanermut akissutitut tiguneqartut inatsisissatut siunnersuummut ilanngunneqarput, tamannalu Inatsisartut Siulittaasoqarfianit piumasaqaatigineqartunut naapertuuppoq.

Taamaattorli takuuk immikkoortoq 3.2.

4. Apeqqutit

4.1 Eqqumiitsuliorneq pillugu aallarniutitut apeqqutit

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap isumaqatigiittup allannguutissatut siunnersuutaa ataani issuarneqartoq UPA2015-mi imm. 32-tut Inatsisartunit isumaqatigiittunit akuersissutigineqarpoq.

”Kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaata nr. 10-p, 21. maj 2002-meersup nutarterneqarneranut atatillugu kultureqarneq pillugu immikkut inatsisissatut siunnersuummik, kultureqarnermut tunngasuni sunngiffimmi sammisassaqaartitsinermik imaqartumik, kiisalu timersornermut inatsisissatut immikkut siunnersuummik, timersornermut tunngasuni sunngiffimmi sammisassaqaartitsinermik imaqartumik, Naalackersuisut kingusinnerpaamik UPA 16-imi saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.”

Ataatsimiititaliap isumaliutissiisummini makku erseqqissarpai:

“Kalaallit Nunaanni eqqumiitsuliornermut inatsit ullutsinnut naleqquttoq atorsinnaasorlu eqqumiitsuliornerup silarsuaani eqqummaarinnissamut kajumissaataassagaluarpoq. taamaattorli ataatsimiititaliamit kulturip eqqumiitsuliornerullu avissaartinneqarsinnaanerat qularineqarpoq. Ataatsimiititaliamit apeqquserneqarpoq kulturip sukcut uninnissaa eqqumiitsuliornerullu sukcut aallartinnissaa Naalackersuisunit qanoq takorloorneqarnerisq. Eqqumiitsuliorneq aamma kultureqarneq inatsisitigut avissaartissagaluaaraanni sulinermi atorsinnaassanngillat kulturimummi killigitinneqartartut tigussaasuunngillat, kultureqarnermullu allanillu tamatumunnga assigusunik sulialinnik nassuiarneqartariaqarlutik, inatsisitigut pinnatik.

Inatsisitigut kultureqarnerup timersornerullu taakkununga immikkoortunut marlunnut iluaqutaasumik avissaartinneqarnissaat ataatsimiititaliamit

paasilluarneqarpoq. Taamaalilluni avitsineq taakkununga immikkoortunut marlunnut arlaannaannulluunniit ajoqutaanngikkaluartumik annertunerusumik iluaqutaasussaavoq.

Kultureqarnermut inatsit politikikkut kultureqarnermut sinaakkutaasussaavoq. Timersornermut inatsit uluinnarni timersornermik atuisunut ilaatigut peqqissutsikkut inuttullu annertuumik aallussinerulernermut iluaqutaasussaavoq. Kultureqarnermik timersornermillu atuisoqartariaqarpoq politikimik ingerlanneqartumik pingaernerutitsisunik. Siunnersuutip uuma pilersinniarneqarnerani ataatsimiititaliamit Naalakkersuisut kaammattorneqassapput kulturimik timersornermillu atuisut sapinngisamik assigiinngitsut amerlasuutigut peqataatinneqarnissaat anguniaqqullugu.”

(UPA2015-mi Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap imm. 32-ip aappassaaneernejarnissaanut isumaliutissiissutaa ulloq 27. april 2015-imi tunniunneqartoq, qupperneq 3-4)

Soorlu siuliani issuaakkami takuneqarsinnaasoq ataatsimiititaliamit qitiutinniarneqarsimavoq inatsisikkut atuisut pisariaqartitaat isiginiarneqartariaqarmata, taamaattumillu taanna sapinngisamik annertunerpaamik pisariitsuusariaqartoq.

Isumaliutissiissut siuliani taaneqartoq kiisalu ataatsimiititaliap allannguutissatut siunnersuutaanik Inatsisartut isumaqatigiittut akuersissutiginninnerat tunngavigalugit eqqmiitsuliornermut inatsisissatut siunnersuutip tusarniaassutigineqarneratali nalaani ataatsimiititaliaq aalajangerpoq Kultureqarnermut, Ilisimatusarnermut, Ilinniartitaanermut Ilageeqarnermullu Naalakkersuisumut saaffiginnissalluni.

Taamaalilluni Kultureqarnermut, Ilisimatusarnermut, Ilinniartitaanermut Ilageeqarnermullu Naalakkersuisoq ilaatigut eqqumiitsuliornerup kultureqarnerullu akornani killigitinneqartut pillugit apeqqutinut arlalinnut akissuteqaqqullugu tusarniaanerup nalaani ataatsimiititaliamit qinnuigineqarpoq. Ataatsimiititaliap apeqqutai kiisalu Naalakkersuisut akissutaat **ilanngussaq 1 aamma 2-tut** ilanngunneqarput.

Siullermeerinninnerup kingorna inatsisissatut siunnersuut ataatsimiititaliamut suliassanngortinneqarmat Naalakkersuisunut allakkatigut apeqquteqaqqinnissaq ataatsimiititaliamit toqqarneqarpoq, tamatumani siunertarineqarluni inatsisip nutaap atulernissaanut sulisunik aningaasanillu kommunit atuisullu atuisariaqarnerannut ikaarsaariarnermi aalajangersakkat qanoq kinguneqarnissaasa paasineqarnissaa.

Ataatsimiititaliap apeqqutaasa kiisalu Naalakkersuisut akissuteqaataasa assilineqarneri isumaliutissiissummut matumunnga **ilanngussaq 3 aamma 4-tut** ilanngunneqarput. Akissutit ataatsimiititaliap siunnersuummik suliarinninnerani immikkoortoq 6-imi ilanngunneqarput.

4.2 Eqqumiitsuliornermut inatsimmut, kultureqarnermut inatsimmut aamma timersornermut inatsimmut apeqqutit ataatsimoortut.

Immikkoortoq 2-ip aamma 3-ip aallartinneranni allanneqartutut eqqumiitsuliornermut inatsisissap, kultureqarnermut inatsisissap aamma timersornermut inatsisissap ataatsimiititaliamit ataatsimut suliarineqarnissat siunertaralugu eqqumiitsuliornermut inatsisissap aappassaanneerseqarnissaa pingajussaanneerseqarnissaalu UPA2016-mut kinguartinneqarpoq. Kultureqarnermut inatsisissap kiisalu timersornermut inatsisissap siullermeerneqarnerisa kingorna inatsisissatut siunnersuutitut taakkununga pingasunut arlalinnik apeqquteqarnissani ataatsimiititaliap pisariaqartissimavaa. Sunngiffimmi ingerlatsinermi pingaarnertut paaserusunneqartunut apeqqutit tunngasuupput, tamatumunnga ilanngullugu sunngiffimmi ornittakkat, tamatumani pingaarnertutillugu sunngiffimmi ornittakkani atuisut akiliuteqartinneqartarnissaat.

Ataatsimiititaliap apeqqutaasa kiisalu Naalakkersuisut akissuteqaataasa assilineqarneri isumaliutissiisummut matumunnga **ilanngussaq 5 aamma 6-tut** ilanngunneqarput. Taakkununga akissutit immikkoortoq 6-mi matuma kingulianiittumi suliarineqarput.

5. Siunersiuinerit

5.1 Eqqumiitsuliornermut inatsit pillugu siunersiuineq

Siunnersuummik suliaqarnerminut atatillugu ataatsimiititaliap Ilinniartitaanermit, Kultureqarnermut, Iisimatusarnermut Ilageeqarnermullu Naalakkersuisoq ulloq 15. oktober 2015 siunersiorpaa. Siunersiuinissamut aggeqqusissutip kiisalu Ilinniartitaanermit, Kultureqarnermut, Iisimatusarnermut Ilageeqarnermullu Naalakkersuisup oqaaseqaatai isumaliutissiisummut uunga **ilanngussaq 7-tut aamma 8-tut** ilanngunneqarput. Ikaarsaariarnermi aalajangersakkat kiisalu eqqumiitsuliornermut inatsit UKA2015-mi akuerineqassagaluarpas kultureqarnermut sunngiffimmilu sammisassaqartitsinermit peqqussut 2002-meersoq eqqumiitsuliornermullu inatsisip nutaap ataatsikkut atuutilersimassagaluarnert siunersiuinermit immikkut sammineqarput. Pingaarnertut sammineqarput eqqumiitsuliornermut inatsimmi nutaami aalajangersakkat suut ingerlaqqinnersut imaluunniit allannagortinneqarnersut.

6. Ataatsimiititaliap siunnersuutininik suliarinninnera

Suliassaqarfiit pingasut tassalu kultureqarnerup, eqqumiitsuliornerup timersornerullu nukittorsarneqarnissaannik naalakkersuinikkut kissaateqarnermut nuannaarutigineqartumut takussutissatut inatsisissatut siunnersuutit ataatsimiititaliamit isigineqarnerat ataatsimiititaliap aallarniutigalugu erseqqissassavaa. Inatsisissat pillugit oqallinnermi aalajangiinnermilu inatsisissat taakku pingasut akuerineqarnerminni qanorluunniit iluseqaraluarpata ataatsimiititaliap neriutigaa naggataatigut nunatsinni inuttaasunut tamanut iluaqutissanngorumaartut.

Tunngaviumik isummerneq ataatsimiititaliap eqqumiitsuliornermut inatsimmik UKA2015-mit UPA2016-imut kinguartitsinissamut qinnuteqaataatigut ersersinneqartoq innersuussutigalugu inatsisit atuuttut avissaartinneqarnissaasa ataatsikkut ingerlanneqarnissaat ataatsimiititaliamit kaammattuutigineqassaaq. Tamumani eqqarsaatigineqarluni Inatsisartut aalajangiiniarnerminni ingerlatsisarnerat, tamatumani inatsimmik atuuttumik siunnersuummi aalajangersakkanut Inatsisartut sanilliussinissamut periarfissinneqarnissaat, minnerunngitsumillu sullissisut atuisullu inatsisip atuutinneqalernissaani peqataaqataasussat kiisalu inatsimmi pisinnaatitaaffinnik atuisuusussat eqqarsaatigalugit. Inatsisissatulli siunnersuutit saqqummiussassat pisut ilaanni ilaat siulliullugit ilaallu kingulliullugit saqqummiunneqarnissaat pitsaaquteqarsinnaasoq ataatsimiititaliamit arajutsisimaneqanngilaq.

6.1 Eqqumiitsuliorneq kulturip ilaatut

Inatsisissatut siunnersuutit pingasut ataatsimiititaliamit suliarineqarnerannut atatillugu ataatsimiititaliamit maluginiarneqarpoq siunnersuinerminni siuliani taaneqartumi Naalakkersuisunit ilaatigut oqaasiinnarmik oqaatigineqarmat eqqumiitsuliorneq kulturip ilagigaa. Taama oqariartuuteqarneq tunngavigalugu ataatsimiititaliamit eqqumiigineqarsinnaavoq kultureqarnermut tunngasuni pingaarnertut sinaakkutissat suli saqqummiunneqanngitsut eqqumiitsuliornermut inatsisissamik saqqummiussinissaq Naalakkersuisut soq toqqarneraat.

Eqqumiitsuliornerup aamma kulturip ulluinnarni atuunnerisa avissaartinneqartariaqarnersut qularutigalugu aammalu avissaartitsineq taanna eqqumiitsuliornermut atatillugu ingerlanneqartariaqarnersoq UPA2015/32-mut isumaliutissiissummini ataatsimiititaliap oqaatigaa. 20. oktober 2015-imi siunnersuinerminni siuliani taaneqartumi Naalakkersuisut erseqqissaatigaat eqqumiitsuliorneq kulturilu avissaartinneqarsinnaasut Naalakkersuisunit isigineqartut (takuuk ilanngussaq 8 apeqqut nr. 3). Taamaalillutik Naalakkersuisut erseqqissaatigaat eqqumiitsuliornerup kulturillu inatsisitigut avissaartinneqarnissaat periarfissaqartoq kiisalu eqqumiitsuliornermut kulturimullu aningaasaliissutit aningaasanut inatsimmi immikkut inissisimareersut. Inuit inatsisinik ilisimasallit aningaasanullu inatsimmik paasinnissinnaasut aningaasanut inatsimmi kontot pingaarnertut immikkoortissinnaagaat ataatsimiititaliamit qularutigineqanngilaq. Ataatsimiititaliamilli erseqqissarneqassaaq inatsisinik imminnut ima ataqatigiitsigisuni allaat imminnut atasunut isigineqarsinnaasunik eqqumiitsuliornermut inuttaasullu ataasiakkaat atuisinnaanissamut periarfissaqarnissaat ataatsimiititaliap sulinermini qitiutissimammagu.

6.2 Inatsisitigut avissaartsitsinerit nutaat nalilersorneqarnerat

Eqqumiitsuliornermut aamma kultureqarnermut inatsisit akuerineqassappata kommunit inatsisinik taakkuninnga marlunnik atuinerannik Naalakkersuisut ataavartumik paasinaasarnissaat iluaqutissataqartoq ataatsimiititaliap isumaqarpoq, tamatumunnga

ilanngullugit inatsisit taakku imminnut qaneqisut marluk ingerlanneqarneranni iluaqutaasinnaasut ajoqutaasinnaasullu.

Taamatutaaq kulturip timersornerullu inatsisitigut avissaartinneqarnerat Kalaallit Nunaanni sungiusimaneqanngilaq. Taamaattumillu ataatsimiititaliamit peqatigitillugu kaammattuutigineqassaaq avissaartitsinermi sunniutit aamma ataavartumik Naalakkersuisumit nalilersorneqartarnissaat. Tamatumaniissaaq nalilersuineri qitiutinneqarsinnaapput innuttaasut pitsaanerpaamik pissarsinissaanni pitsaaqutit pitsaanngequtillu kiisalu nuna tamakkerlugu kommuninilu inatsisinik aqutsineq pitsaasuunersoq. Taamatut tamakkiisumik takussutissiisarnissaq ataatsimiititaliamit soqutiginaateqartinneqarpoq.

6.3 Kultureqarnermut inatsit immikkut

Kultureqarnermut inatsisissatut siunnersuut tusarniaaffigineqartunit Inatsisartunillu nuannaarutigineqarluni tigulluarneqartoq ataatsimiititaliamit oqaatigineqassaaq. Taamattumillu kultureqarnermut inatsisissap piviusunngortinneqarneratigut iluaqutissarpasuit taakkartorneqareersut ataatsimiititaliamit uteqqinneqassanngillat.

Inatsisissatut siunnersuummik suliaqarnermini sungiffimmi ingerlatsinermi aalajangersakkat kiisalu sunngiffimmi ornittakkanut aalajangersakkat nutaat ataatsimiititaliamit qitiutinneqarsimapput. Tamatumunnga atatillugu ataatsimiititaliaq arlalinnik apeqquteqarpoq takukkit ilanngussaaq 5 amma 6.

Sunngiffimmi ingerlatsineq, tassungalu ilanngullugu sunngiffimmi atuartitsineq pillugit kultureqarnermut inatsimmi aalajangersakkanut tunngatillugu ataatsimiititaliamit Naalakkersuisut qinnuigineqarput kultureqarnermut inatsimmi timersornermut atatillugu sunngiffimmi ingerlatsinermut aalajangersakkat nassuiaateqarfigeqqullugit. Kultureqarnermut inatsimmi § 1, imm, 5-imi ima allassimasoqarpoq:

Imm. 5. Inatsisartut inatsisaat kulturikkut ingerlatsinermut sunngiffimmilu sammisassaqtitsinermut inatsit alla aqqutigalugu malittarisassiorneqarsimasumut atorneqassanngilaq.

§ 1, imm, 5-imi ima allassimasoqarpoq:

”Aalajangersagaq imm. 1-imi sumut atorneqarnissaani ajunngitsumik killiliinermut aamma imm. 2-4-mi nassuiaatinut ajunngitsumik killiliinernut peqatigitillugu inatsisartut inatsisaanni atuuffinnut killiliivoq. Kultureqarnermut sunngiffimmilu sammisassaqtitsineq inatsisit allat aqqutigalugit tunngaveqartinneqartoq tassaasinnaapput radiomik tv-millu ingerlatsineq pillugu inatsit, atuagaateqarfeqarneq pillugu inatsit, katersugaasiveqarneq pillugu inatsit, tamannalu pillugu tunngaviusumik inatsisissatut siunnersuutip saqqummiunneqartup akuersissutigineqarnerani eqqumiitsuliornermik ingerlataqarneq aamma timersorneq timigissarnerlu pillugit inatsisit.”

Tamatumunnga atatillugu ataatsimiititaliaq Naalakkersuisunut ima apeqqueteqaateqarpoq:

”Sunngiffimmi sammisassaqaartitsinermit kommuninit neqeroortigineqartartuni timersornermut inatsimmi piumasaqaateqannginnera Naalakkersuisunik uppernarsarneqarsinnaava?”

Naalakkersuisut ilaatigut ima akipput:

”Aallarniutigalugu ilisimatitsissutigineqassaaq kulturikkut ingerlatsineq pillugu inatsimmi sunngiffimmi atuartitsineq pillugu aalajangersakkat maannamutut aamma timersornermik ilaqarsinnaammata. Tamatumani tassani pineqarpoq sunngiffimmi atuartitsineq, taamalu kulturikkut sunngiffimmilu sammisassaqaartitsinerunani, tamanna inatsisini allani aalajangersaavigineqarmat.”

Naalakkersuisut akissutaat ataatsimiititaliamit ima paasineqarpoq; Naalakkersuisut kultureqarnermut inatsimmi § 1, imm. 5-imi aalajangersaraat timersornermut tunngasuni sunngiffimmi ingerlatsineq aalajangersimasoq timersornermut inatsimmi aalajangersakkami aalajangersimasumi maleruagassiuunneqarsimanngippat pineqartoq pillugu kultureqarnermut inatsimmi aalajangersagaq atuutissasoq. Taamaalillunilu sunngiffimmi ingerlatsineq eqqarsaatigalugu kultureqarnermut inatsit timersornermut tunngasuni atuutinngitsutut isigineqassanngilaq.

Kultureqarnermut inatsisissatut siunnersuutikkut sunngiffimi ornittakkat pillugit nutaanik arlalinnik aalajangersagaliortoqarpoq. Taamaaliornikkut sunngiffimi ornittakkat siunnersuutip kapitali 5-iani maleruagassiuunneqarput. Tamatumunnga atatillugu aalajangersakkat nutaat taakku pillugit arlalinnik apeqqueteqarnissaq ataatsimiititaliamit aalajangiunneqarpoq, tak. immikkoortoq 4.2.

Ataatsimiititaliaq ima aperivoq:

”Kultureqarnermut inatsisissatut siunnersuummi § 24-mi ima allassimasoqarpoq:

“§ 24. Sunngiffimmi ornittakkamik atuineq akeqartinneqassaaq (nammineq akiliineq), taamaattoq tak. imm. 3. aamma 4.

Imm. 2. Sunngiffimmi ornittakkap agguaqatigiissillugu ingerlatsinermit aningaasartuutissaatut missingersuusiukkat ilanngaaserneqanngitsut aamma akiliuteqartussap akiliuteqartussalluunniit aningaasaqarnikkut inissisimanerat tunngavigalugit kommunip sunngiffimmi ornittagaataanik atuinissamut nammineq akiliutissaq aalajangersarneqassaaq.

Imm. 3. Nammineq akiliutissap appartinneqarnissaanut kommunalbestyrelse tapiissuteqassaaq. Sunngiffimmi ornittagaq atorpeqartoq qanorluunniit isikkoqaraluarpat aningaasat aalajangersimasumik amerlassusillit kommunalbestyrelsimit tapiissutigineqassapput.

Imm. 4. Naalakkersuisut kommunalbestyrelsimik isumasioqateqareerlutik malittarisassaliussavaat kommunip sunngiffimmi ornittagaani, sunngiffimmi ornittakkami imminut pigisumi sunngiffimmilu ornittakkami namminersortumi meeqqat najugaqarnermut akiliutissaat, tassunga ilanngullugit isertitaqqortussuseq naapertorlugu akiliuteqartarnej, nammineq akiliutissap appartinneqarnissaannut tapiissutit, akiliutissanik akiitsoqalernerme meeqqap ornittakkamiikkunnaarnissaa aamma kommunimi sunngiffimmi ornittakkamik, sunngiffimmi ornittakkamik imminut pigisumik sunngiffimmilu ornittakkamik namminersortumik atorunnaarsitsineq pillugit malittarisassaliussallutik.”

§ 24 imm. 1-mi qulaani taaneqartumut nassuiaatini ima allassimasoqarpoq:

“24-mut

Aalajangersagaq nutaajuvoq suleriaatsimillu aaqqissuussinermut ersisitsilluni. Imm. 1-imut Aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat § 39 tunngavigalugu kulturikkut ingerlatsinermut sunngiffimmilu sammisassaqartitsinermut aningaasartuutit tamarmik kommunimit akilerneqassapput. Tamanna sunngiffimmi ornittakkamik atuinerup akeqartinneqarnissaanut aporfissaliinngilaq.

Imm. 3-mut innersuussineq ersiutaasoq tassaavoq, ilaannakortumik atuisunut akiliuteqartitsineq taamaallaat pineqartoq.

Imm. 4-mut innersuussinermut ersiutaavoq, sunngiffimmi ornittakkamik atuisunut akiliuteqartitsineq pillugu nalunaarutikkoortumik malittarisassiortoqarsinnaasoq, matumani isertitaqqortussuseq naapertorlugu akiliuteqartitsisarnej pillugit aqutsineq ilanngullugu.”

3. Tamanna suleriaatsimut “aalajangersagaasoq” ataatsimiititaliamit paasineqarpoq. Kommunip Inatsisitigut ersarissumik tunngavissaqarani sullissinermut akiliisitsisarsinnaanera periarfissaava?

Naalakkersuisut taamatut isumaqanngippata:

a) Fritidshjemmenik atuinermut akiliisitsisarsimasunit akiliutigineqarsimasut innuttaasunut utertinneqarnissaat siunertaralugu kommunit Naalakkersuisunit nakkutilliisoqarfianut unnerluutigineqarniarpat?

Tamatumunnga Naalakkersuisut ima akissuteqarput:

Nalinginnaasumik siunnersuummut oqaaseqaatini nassuiarneqarput sunngiffimmi ornittakkanut malittarisassat atuuttut. Taakkunani ersippoq sunngiffimmi ornittakkat piffimmi pilersinneqarsimasut ikaarsaariarnermut aalajangersakkat Meeqqanut suli atualin-ngitsunut perorsaaniikkut ineriartuutaasunik ulluunerani neqeroorutit pillugit Inatsisartut inatsisaat nr.

16, 3. december 2012-imeersumi (Atualerneq sioqqullugu inatsit) aalajangersakkat tunngavigalugit. Sunngiffimmi ornittakkanik atuinnermut akiliutinut tunngatillugu § 29, imm. 1-imi atualerneq sioqqullugu inatsimmi aalajangersarneqarpoq kommunalbestyrelsit akiliuteqarnissamik piumasqaarsinnaasut meeqqat kommunit atuareernerme neqeroorutiniittarnerannut, malittarisassat Naalakkersuisut aalajangersarneqartut naapertorlugit, takuuk imm. 3. Akiliutissaq annertussusilerneqartassaaq kommunip aningaasartuutai aamma akiliuteqartussap aningaasaqarnikkut inissisimamala tunngavigalugit. Soorlu siunnersuummi § 24, imm. 4-mut oqaaseqaatini nalunaarneqartoq aalajangersagaqarpoq akiliutissat annertussusissaannik perorsaannikkut ineriartuutaasunik ulluunerani meeqqanut atualerneq sioqqullugu neqeroorutaasartunut tunngatillugu, Meeqqanut suli atualinngitsunut perorsaannikkut inerikkiartuutaasunik ulluunerani neqeroorutinut akiliuteqartarneq pillugu Namminersorlutik Oqartussat Namminersorlutik Oqartussat nalunaarutaat nr. 3, 4. februar 2011-imeersumi. Taamaasilluni § 2 imm. 2-mi aalajangersarneqarpoq, ”Meeqqanut suli atualinngitsunut perorsaannikkut inerikkiartuutaasunik ulluunerani neqerooruteqartarneq pillugu Inatsisartut peqqussutaanni nr. 10-mi, 5. december 2008-meersumi § 31, imm. 3 naapertorlugu sunngiffimmi ingerlataqarnermik aqqissuussineq pillugu Inatsisartut inatsisaata akuerineqarnissaata tungaanut sunngiffimmi ornittakkaniinnermut akinik immikkut aalajangersaasoqarsinnaavoq”. Taamaasilluni pisariaqartumik aalajangersakkamik pilersitsisoqarsimavoq sunngiffimmi ornittakkamiittisinnermut atatillugu annertussusileriikkamik akiliuteqartitsisarnissamut.

§ 24, imm. 1-imi nalunaarneqarmat aalajangersagaq nutaajusoq, kisiannili periaatsimik atortooreersumik allaganngorlugu malittarisassiornerusoq, tamanna isigineqassaaq inatsisitigut aalajangersakkanik pisussaaffeqariinngimmat, atuisup nammineq akiliuteqarnissaanut akiligassiissuteqartarnissamut, kisiannili kommunit akiliuteqartitsisarneq pillugu nalunaarut naapertorlugu akiliutaasussamik annertussusiliisarnerannik, sunngiffimmi ornittakkanik atuinnermut tunngatillugu, isertitat tunngavigalugit annertussusiligaasumik.”

Sunngiffimmi ornittakkanut atuisut akiliuteqartarnissaannut ersarissumik inatsisitigut tunngavissaqarnerisoq ataatsimiititaliamit isummerfigineqanngilaq.

Siunnersuummi § 19, imm. 1-imi ima allassimasoqarpoq:

§ 19. Kommunalbestyrelsip sunngiffimmi atuartitsinnermi peqataasut akileeqqusinnaavai.

Sunnigiffimmi atuartitsinermit peqataanermit akiluteqartitsinissamut kommunalbestyrelsit pisussaaffeerunnerat ataatsimiititaliamit maluginiarneqarpoq, tamatumalu inuttaasunit sapinngisamik amerlanerpaanit atorluarneqarnissaa ataatsimiititaliamit neriuutigineqarpoq.

Sunnigiffimmi neqeroorutit najukkani innuttaasunit annertunerusumik ilisimaneqalernissaannut kultureqarnermit sunngiffimmilu sammisassaqaartitsinermit peqqussummik maanna atuuttumut sanilliulluni kultureqarnermit inatsit periarfissiisoq ataatsimiititaliaq isumaqarpoq, tassuunakkulli neqeroorutit amerlanerulernissaannut aammalu sunngiffimmi neqeroorutit atorneqarnerulernissaannut aamma periarfissiisoqarpoq. Taamaalillunilu kultureqarnermit inatsimmi uku ataatsimiititaliamit nuannaarutigineqarput:

- § 4, imm. 1, kommunalbestyrelsimut peqqusivoq kultureqarnermi sammisassaqaartitsinermilu ingerlatsinermi pilersaasutit kommunit nittartagaannut saqqummiunneqartarnissaannik.
- § 5, imm. 2, nr. 2, erseqqissaavoq kommunalbestyrelsit ininik allanillu atugassanik pissarsiniarnermi ikiuussinnaasut, tamatumalu saniatigut kultureqarnermi aamma sunngiffimmi ingerlatsinermi ininut allanullu atugassanut ingerlatsinermit aningaasartuutitut tapiisinnaallutik.
- § 9-mi sammisassat suut Naalakkersuisunut aamma kommunalbestyrelsimit taperneqarsinnaanersut pineqarput.

§ 9-mut tunngatillugu ataatsimiititaliamit maluginiarneqarpoq ”-sinnaapput”-mik aalajangersagaliortoqarmat. Taamaalillutik Naalakkersuisut kommunalbestyrelsillu sammisassanut ingerlatsinermit, peqatigiiffinnut, pilersitanut il.il. § 9-mi taaneqartunut tapiissuteqarnissamut pisussaaffeqanngillat. Taamaakkaluortoq tapiissuteqarnissamut periarfissat inatsimmi atuuttumi aalajangersarneqartut annertusineqarput. Assersuutitut taaneqarsinnaavoq Naalakkersuisut Kalaallit Nunaata avataani kultureqarnermi sunngiffimmilu ingerlatanut maanna tapiinissamut periarfissaqalernerat. Tamatuma saniatigut aalajangersakkami qitiutinneqarput sammisat meeqqanut, inuusuttunut inunnullu aalaniarnermikkut killilinnut kiisalu inuunerlulernissamut ulorianartorsiortunut sammisut.

Kultureqarnermit sunngiffimmilu ingerlatsineq pillugu Inatsisartut peqqussutaanni nr. 10-mi, 2002-meersumi aalajangersakkat ilaat kultureqarnermit inatsimmi ingerlateqqinneqanngitsut pillugit kultureqarnermit inatsimmut nassuiaatini nalinnginnaasuni Naalakkersuisut ima oqaaseqarput:

”Siunnersuummi § 10, imm. 1-imi sunngiffimmi atuartitsineq pillugu nassuiaatini ersarissarneqarpoq sunngiffimmi atuartitsineq ilinniarnissamut inuussutissarsiulernissamullu tunniussisuunngitsoq. Inatsisip nutarternerani siunertat ilagaat piginnaaneqalissutaasumik atuartitsineq sunngiffimmi atuartitsinermit ilaatinneqassanngitsoq, taamaattoq ilinniartitaaneq pillugu inatsimmit aalajangersarneqassasoq.”

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap isummernerata UPA2015/32-mut ataatsimiititaliap isumaliutissiissutaani taaneqartup Naalakkersuisunit isumaqatigineqarsorinarnera ataatsimiititaliamit nuannaarutigineqarpoq. Isumaliutissiissummi tassani ataatsimiititaliamit Naalakkersuisut kaammattorneqarput aalajangersakkat kultureqarnermut sunngiffimmilu ingerlatsinermit tunngassuteqanngitsut inatsimmut immikkoortumut tassunga naleqquttunik aalajangersagalimmut iluarsiiisutigeqqullugit.

6.4 Eqqumiitsuliornermut inatsit immikkut

Kalaallit eqqumiitsuliaat, kalaallit eqqumiitsuliornermut atugaat aammalu kalaallit innuttaasut kalaallit eqqumiitsuliaannik assigiinngitsunik eqqumiitsuliornermillu ingerlatsisunik nunanit allaneersunik takunnissinnaanissaat siunnersuutip matuma aalajangersaagaani qitiutinneqarmat ataatsimiititaliamit pitsaalluinnartutut isigineqarpoq.

Ataatsimiititaliap paasinninnera malillugu eqqumiitsuliornermut inatsisissatut siunnersuummi ilaapput eqqumiitsuliornermik ingerlatsinermit tunngaviusunik paasinnineq kiisalu tassannga ingerlatsineq. Tamatuma saniatigut kommunini nunalu tamakkerlugu eqqumiitsuliornermik ingerlatsinermit pingaarnertut atugassarititaasut siunnersuummi ilaatinneqarput. Aappattut inuussutissarsiutigalugu eqqumiitsuliornermik ingerlatsinermit tapiiffigineqarnissamut tunngatillugu siunertat, piimasaqaatit pisinnaatitaaffiillu inatsisissatut siunnersuutip imarai. Siunnersuutip suliarineqarnerani eqqumiitsuliornermik ingerlatsinerup aningaasanut tunngasortaasa, tassa tapiissutit kisimik sammineqannginnissaat, inatsisikkulli inuussutissarsiutigalugu eqqumiitsuliornermut aammalu eqqumiitsuliornermik ingerlataqarnerup innuttaasunut ingerlateqqinneqarnissaani naalakkersuinikkut sinaakkutissat atugassallu erseqqissumik aalajangersarneqarnissaat ataatsimiititaliamit pingaartinneqarpoq. Tamatumunnga atatillugu ataatsimiititaliamit erseqqissarneqassaaq eqqumiitsuliornermut inatsimmik suliarinnittoqarneratigut akuersissutiginnittoqarneratigullu siviisuumik ingerlataqarsimaneq aammalu eqqumiitsuliornermit atugassarititaasut qitiutillugit sammineqarnissaannik kissaateqarneq tassungaannaq killinngimmat. Paarlattuanilli siunnersuut manna eqqumiitsuliornermut atugaasa kiisalu inuttaasut eqqumiitsuliornermut periarfissaasa annersusarneqarnissaannik qulakkeerinnittussatut isigineqassaaq.

Eqqumiitsuliorneq eqqumiitsuliornerullu silarsuaa inatsisiliunneqarpat sinaakkutit eqqumiitsuliornermut eqqumiitsulianullu ilaatigut tulluussarfigiuminaatsut pilersinneqassasut qularutissaanngilaq. Eqqumiitsuliornermut kalaallit pillugit inatsimmi nassuiaatissatut siunnersuutigineqartoq naapertuutinngitsortaqarmat Katersugaasiviit kattuffiata, NUKAKA-p, tikkuarpaa.

Eqqumiitsuliornermut inatsimmi § 2 imm. 2-3-mi ima allassimavoq:

”Imm. 2. Kalaallit eqqumiitsuliaattut isigineqarput suliat eqqumiitsuliortunit kalaallinit suliarineqarsimasut imaluunniit eqqumiitsuliormik ingerlatsineq eqqumiitsuliortunit kalaallinit ingerlanneqartoq.

Imm. 3. Eqqumiitsuliortut kalaallisut isigineqarput, eqqumiitsuliortut Kalaallit Nunaanni aalajangersimasumik najugallit.”

Eqqumiitsuliormi inatsimmi § 2, imm. 2-3-mut nassuiaatini ima allassimavoq:

”Imm. 2-mut.

Aalajangersakkami aalajangerneqarpoq kalaallit eqqumiitsuliaat qanoq paasineqarnersut. Aalajangersagaq marloqiusaasunik imaqarpoq. Ilaatigut pineqarput suliat eqqumiitsuliortunit kalaallinit suliarineqarsimasut ilaatigullu pineqarluni eqqumiitsuliormik ingerlatsineq eqqumiitsuliortunit kalaallinit ingerlanneqartoq. Taamaalilluni pineqarput eqqumiitsuliormi ingerlatap inernera, tassalu suliaq, aamma eqqumiitsuliormik ingerlatsineq, ingerlatsinermi imminermi saqqummersoq, soorlu erinarsornikkut imaluunniit qitinnikkut.

Nassuiaammiippoq piumasagaat, tassalu suliaq imaluunniit eqqumiitsuliormik ingerlatsineq eqqumiitsuliortunit kalaallimit piliaassasoq. ”Eqqumiitsuliortoq kalaaleq” siunnersuummi § 2, imm. 3-mi nassuiarneqarpoq.

Kalaallit eqqumiitsuliaannik nassuiaat qangaaniilli kalaallit eqqumiitsuliaattut isigineqartartunut killeqartinneqanngilaq, soorlu tupillianut, ukkusissamik sanaanut il.il. Nassuiaammut aammattaaq ilaapput suliat allat aamma eqqumiitsuliormik ingerlatsineq, soorlu qalipakkat ilisarnartuliaanngitsut, isiginnaartitsinerit il.il. Eqqumiitsuliortut arlallit ilisimaneqarput assigiinngitsorpassuarnik eqqumiitsulioriaaseqartut, allalli eqqumiitsulioriaatsip aalajangersimasup iluani immikkut sammisaqartuusarlutik. Taamaammatt nassuiaat aamma isigineqarpoq eqqumiitsuliortunik naligiissitsisut, eqqumiitsulioriaatsip suulluunniit iluani sulisaraluarpata.

Imm. 3-mutA alajangersakkami eqqumiitsuliortut kalaallit qanoq paasineqarnersut aalajangersarneqarpoq.

Aalajangersakkami siullermik aalajangerneqarpoq, eqqumiitsuliortut Kalaallit Nunaanni aalajangersimasumik najugallit eqqumiitsuliortut kalaallisut isigineqartut. Taamaalilluni eqqumiitsuliortut kalaallit nassuiaataat sumi najugaqarnermut attuumavoq, kikkunnit kingoq-qisuuneq pinnani. Aalajangersimasumik najugalittut isigineqarput innuttaasut, inuit aqqisa allassimaffianni Kalaallit Nunaanni najugaqartutut nalunaarsoqqasut. Aalajangersimasumik najugaqarfittut isigineqarpoq sumiiffik, inuup siniffigisarlugulu pisataqarfigisaa. Imaappoq innuttaasoq arlalinnik illoqarsinnaavoq, ataasiinnarmilli najugaqarfeqarluni. Najugaqarfik tassaavoq ineqarfik innuttaasup attuumassuteqarfiginerusaa.”

Eqqumiitsuliortut kalaallisut isigineqartut ilaasa nunatta avatani najugaqarnerat NUKAKA-p tikkuarpaa. Tamatuma saniatigut Naalakkersuisut eqqumiitsuliornermi piffissamik pilersitsiffiusumik qanoq nalilersuinissaat NUKAKA-mit apeqquserneqarpoq, tamatumani assersuutigalugu pilersitaq kalaallit nunaanni najugaqartilluni suliarineqarsimappat kingornalu eqqumiitsuliortoq nunatsinnit allamut nuussimappat.

Tusarniaanermut akissutit pillugit nalinginnaasumik nassuiaatini ima allassimavoq:

”NUKAKA-p tusarniaanermut akissutaat tunngaviatigut inatsisissatut siunnersuummi allannguutinik nassataqanngillat.

Najukkamut tunngatillugu piumasaqaammut nassuiaatit § 2, imm. 3-mut oqaaseqaatit innersuunneqarput, tassani allaqqavoq kalaallit eqqumiitsuliortut nassuiaataat sumi najugaqarnermut attuumasoq sumit kingoqqisuuneq nassuiaatit atorneqarani. Kalaallit eqqumiitsuliortut Kalaallit Nunaata avataani najugaqartut, soorunami tassaajuassapput kalaallit eqqumiitsuliortut. Kisianni eqqumiitsuliortut taakku inatsisissatut siunnersuut manna naapertorlugu tapiissutisisinnaassanngillat.”

NUKAKA-p kalaallit eqqumiitsuliortut nassuiaataat pillugu ernumassutini saqqummiussimannikkaluarpagit sumi inunngorsimaneq tapiissunik tunniussisarnermi piumasaqaatinut ilaasoq eqqumiitsuliornermut inatsimmi takuneqarsinnaassanngikkaluarpoq. Nassuiaatit taaneqartut tapiissutinik tunniussinissamut piumasaqaatit pillugit eqqumiitsuliornermut inatsimmi aalajangersakkanut ilaasut atatsimiititaliamit ilisimaneqarpoq. Ataatsimiititaliarli isumaqarpoq eqqumiitsuliortoq inuiaqatigiinnut ilaasutut inuiaqatigiinnit akuerineqarsimappat eqqumiitsuliortup inuiaqatigiinnut atanera pillugu nalinginnaasumik nassuiaasiornissaq naalakkersuinikkut imaanngilaq naleqquttuusooq. Paarlattuanik tapissutinik tunniussisarnermi piumasaqaatit inatsisikkut erseqqissumik aalajangersarneqarnerat ataatsimiititaliamit soorunami tapersorsorneqarpoq. Taamaalillunilu ataatsimiititaliamit tikkuarneqassaaq nassuiaatip siunertaa kiisalu nassuiaatip tapiissutinik tunniussinissamut piumasaqaataanera eqqumiitsuliornermut inatsimmi imaluunniit eqqumiitsuliornermut inatsimmut nassuiaatini erseqqinnerusumik allanneqarsimagaluarpat naapertuunnerusimassasoq. Inatsimmik suliaqarnerup ingerlaqqinnerani tamanna isumaliutigeqqullugu Naalakkersuisut ataatsimiititaliamit kaammattorneqarput.

Eqqumiitsuliornermut inatsit naapertorlugu kommunit Naalakkersuisullu sulinik suliaqarsinnaanerannut periarfissat arlalissuit siunnersuutikkut periarfissiissutigineqartut ataatsimiititaliamit maluginiarneqarpoq. Eqqumiitsuliornermut inatsisip aamma kultureqarnermut sunngiffimmilu sammisassaqaartitsinermut peqqussutip sanilliullugit assersuusiarineqarnissaat 20. oktober 2015-imi siunersuineranut atatillugu ataatsimiititaliamit qinnutigineqarpoq. Assersuusiaq oqaasissat allattorsimaffiannut ilanngussatut ilanngunneqarsimavoq (takuuk ilanngussaq 8). Eqqumiitsuliornermut inatsimmi

aalajangersakkanut ataasiakkaanut takussutissiaq paasiumanartoq pillugu Naalakkersuisut ataatsimiititaliamit qujassuteqarfigineqarput. Takussutissiaq tunngavigalugu ataatsimiititaliamit paasineqarpoq ilaatigut aningaasanik tapiissuteqartarneq pillugu aalajangersakkat ilaasa aammalu kommunit ininik piareersimatitsisussaanerisa saniatigut eqqumiitsuliornermut inatsit aalajangersakkanik ”-sinnaavoq”-nik annertuumik tunngaveqartoq. Pisussaaffinnut ersarissunut nassuiaatinik siunnersuut amingaateqartutut ataatsimiititaliamit oqaatiginiarneqanngilaq, aningaasaqarnermulli pissutsit eqqumiitsuliornermut inatsimmiittut pillugit Naalakkersuisunut kommuninullu erseqqilluinnartunik piumasaqarnissaq pingaartinneruneqarsimasorinarpoq. Aningaasatigut tapiissutit eqqartorneqartillugit aalajangersakkat ersarissuunerat ataatsimiititaliamit pitsaasutut isigineqarmat pissusissamisoorpoq, peqatigisaanilli akuusut tamarmik kaammattorneqarput periarfissat eqqumiitsuliornermut inatsimmi ammaanqartut atorluaqqullugit.

Ataatsimiititaliaq isumaliutissiisummik suli tunniussaqaqngitsoq Naalakkersuisut allannguutissatut siunnersuummik tunniussaqaqarput, taamaalilluni eqqumiitsuliornermut inatsit akuerineqassaguni 1. januar 2017-imi atuutilissalluni.

6.5 Timersornermut inatsit immikkut

Eqqortumik tunngavissaqarluni timersornermi sunniutai pitsaasut amerlasinnaapput. Taamaalillunilu timersornermut immikkut inatsisiliornikkut inuuniarnikkut naligiinngittoqarnerata akiorniarneqarnerani, inuttaasut akuulersinneqarnissaanni, inuulluarniutit kingunerinik nappaatit akiorniarneqarneranni il.il. timersornerup immikkut periarfissiisutai eqqumaffigineqarnerulissasut ataatsimiititaliamit neriutiginerpoq. Tamanna timersornermut inatsisissatut siunnersuutikkut ersarissumik periarfissinneqartoq ataatsimiititaliaq isumaqarpoq.

Siusinnerusukkut taaneqareersutut UPA2015/32-ip kinguneranik timersornermut inatsisissatut siunnersuut pilersinneqarpoq. Timersornerup pitsaasumik kingunerisinnaasaasa immikkut eqqumaffigineqarnissaannut kiisalu peqataanissamut aningaasatigut aporfiusinnaasut annikillisinneqarnissaannut kommunit Naalakkersuisullu iliuseqarnissamut peqquneqarnissaannut aammalu timersornerup timigissarnerullu ataatsimut isigalugu siuarsavigineqarnissaannut UPA2015/32-imik akuersissutiginninneq Naalakkersuisunit atorluarneqarsimammat ataatsimiititaliamit pitsaasutut isigineqarpoq.

Imm 6.3-mi taaneqartutut timersornermi inatsimmi aalajangersakkanik taamaattunik peqanngippat kultureqarnermut inatsisip kultureqarnermi sunngiffimmilu sammisassaqaqtitsinermi aalajangersagai timersornermi tunngasuni aamma atuutissapput.

Ataatsimiititaliap apeqqutaanut, tak. ilanngussaq 6, Naalakkersuisut akissutaata matuma kinguliani issuarneqarnerani sunngiffimmut tunngasuni pissutsit suut timersornermut inatsisikkut maleruagassiuunneqarnerisut Naalakkersuisunit nassuiarneqarpoq:

“[...] Timersornermut inatsimmi § 8, imm. 1-imi aalajangersarneqarpoq Naalakkersuisut aamma kommunalbestyrelsit timersornermut kattuffiit peqatigiiffiillu suleqatigalugit qularnaassagaat timersornerup timigissartarnerullu nunatsinni kikkunnit tamanit periarfissaanissaat, tamatumani aamma immikkut inuiaqatigiinni pisariaqartitsisunut aammalu aningaasatigut peqataanissamut killilersuutaasinnaasut annikinnerulersinniartarlugit. Tamatumunngalu ilaliullugu § 8, imm. 2-mi aalajangersarneqarpoq inuiaqatigiinni kikkut immikkut isiginiarneqartassanersut pingaartinneqarlutillu.

Timersornermut inatsimmi § 9, imm. 1-ip aalajangersarparaa Naalakkersuisut aamma kommunalbestyrelsit timersornermi kattuffiit suleqatigalugit aqutissiuuttassagaat tapersorsorlugulu, aammalu killiliussanik pitsaasunik pilersitsissasut, nammineq piumassutsimik timersornerup timigissartarnerullu iluani suleqataasarnissaq.

Taamaasillunilu aalajangersakkani pineqartuni pingaarnertut piumasaqaatinik aalajangersaasoqarsimavoq aamma kommunini atuuttunik.

Piumasaqaatit pingaarnertut taakkua ilassuserneqarput kommuninut atatillugu timersornermut inatsimmi §§-ini 15-imiit 17-imut, taakkunani ersarinnerusumik aalalangersaavigineqarmata kommunit akisussaaffii, pisussaaffii aamma periarfissaat inatsisip suliassaqarfiani.

Taamaasilluni § 15, imm. 1-imi aalajangersarneqarpoq kommunalbestyrelsit pingaarnertut akisussaaffigigaat timersornerup iluani siammasissumik timersornikkut timigissartarnikkullu assigiinngisitaartunik neqerooruteqarnissaa kommunimi, tamatumunngalu anguniakkanik killiliussassanillu aalajangersaasoqartassasoq. Tamatumunngalu tapiliullugu imm. 2-mi aalajangiunneqarpoq kommunalbestyrelse ukiut tamaasa pilersaarusiortassasoq kommunip illoqarfiini aamma nunaqarfiini timersornikkut timigassartarnikkullu neqeroorutaasussanik, pilersaarusiartu taanna kommunip nammineq quppersagaani tamanut takusassiarineqartassasoq.

§ 16, imm. 1 aamma 2-mi malittarisassanik aalajangersaasoqarpoq kommunalbestyrelsip tapiiffigisinnaagai sanaartorneq, aserfallatsaaliineq, iluarsaaqqinneq aamma pequsersuineq timersortarfinnik, aammalu tapiissutit taamaattut pingaarnertut najukkami namminermi timersornermut ingerlatsivinnut tunniunneqartassasut. § 16, imm. 3-mi aalajangersarneqarpoq kommunalbestyrelse ininik aamma silami timersornermut ingerlatsivinnut ingerlatsinermut tapiissuteqartarsinnaasoq, timersornermut klub-init ingerlanneqartunut pigineqartunulluunniit, aammalu § 16, imm. 4-mi aalajangersarneqarpoq kommunalbestyrelsit tapiissuteqartarsinnaasut sumiiffinni timersornermut timigissartarnermullu suliniutinut, tamatumani aamma najukkani timersortartut peqatigiiffiinnut klub-iinullu.

Aningaasalersuisarnermut tunngasut timersornermut inatsimmi § 27, imm. 1-imi aalajangersaavigineqarput, timersornermut timigissartarnermullu aningaasartuutit tamaasa kommunit pisussaaffigigaat, tamatumunnga atatillugu ersarissunik inatsisini aalajangersagaqariinngippat aningaasartuutit tamakkiisumik ilaannakuusumilluunniit Namminersorlutik Oqartussat allalluunniit pisussaaffigigaat.

Tamatumunngalu ilialiullugu ilisimatitsissutigineqassaaq timersornermut inatsit aamma arlalinnik pisinnaatitsissutinik aalajangersagartaqarmat, taakkualu naapertorlugit Naalakkersuisut ersarinnerusunik aalajangersagaliorsinnaammata. Tamanna taamaasilluni atuuppoq § 8, imm. 3-mi tamanut ammasuunissamik aalajangersakkamut atatillugu, § 9, imm. 2 kajumissuseqarluni suliaqarnermut tunngatillugu, § 15, imm. 3 ukiumoortumik timersornermut timigissartarnermullu neqeroorutitut tunngatillugu, kommunip illoqarfiini nunaqarfiinilu aammalu § 16, imm. 5 kommuninit tapiissutinut tunngatillugu. Issuaaneq taanna ersarissaq ataatsimiititaliamit tusaatissatut tiguneqarpoq neriutigalugulu kommunini atorluarneqarumaartoq.

Eqikkaaneq sukumiisoq taanna ataatsimiititaliamit tusaatissatut tiguneqarpoq, neriutigineqarporlu ilaatigut kommuninit atorluarneqarumaartoq.

Timersornermut inatsimmi § 21 naapertorlugu kalaallit nunaanni arlaannaanulluunniit attaveqanngitsumik aalajangiisartutut ataatsimiititaliamik nutaatut pilersitsisoqarpoq, Anti Doping Kalaallit Nunaat. Aalajangiisartutut atatsimiititaliap siunertaraa kalaallit nunaanni timersornermi timigissarnermilu nakorsaatinik atuilluni pissassartarnerup siunnerfilimmik aqqissuussamillu akiorniarniarneqarnerata annertusarnissaa, tamatumunnga ilanngullugu pitsaaliuineq akiuiniarnerlu. Tamatumunnga atatillugu aamma naammagittaalliortarfimmik pilersitsisoqassaaq, Grønlands Dopingnævnet, takuuk timersornermut inatsimmi § 26.

Timersornerup toqqissisimasup, isumannaatsup minguitsullu suliniutigineqarneranut atatillugu timersortartorpalaartumik ingerlatsinissaq sinnersuutikkut aamma pilersinniarneqarpoq. Nakorsaatit pissassaait akiorniarniarnerisa, meeqqanik atornerluisimanngininnermut uppersaateqarnissamik piumasaqaatip il.il. saniatigut sunniiniartarneq peqquserlutsitsiniartarnerlu pillugit aalajangersakkannik timersornermut inatsit imaqarpoq.

Kalaallit Nunaanni timersornerup timigissartarnerullu toqqissisimanartuunissaata, isumannaatsuunissaata minguitsuunissaatalu qulakkeerneqarnissaa ataatsimiititaliamit tapersorneqarpoq aammalu inuinnartut unammisartutullu unammisarnermi suliniutit taakku ilanngunneqarnissaat ataatsimiititaliamit pitsaasutut isigineqarluni. Tamanna nunatsinni tamani timersortartunut timigissartartunullu ersarissumik pitsaasumillu takutitsinertut

ataatsimiititaliamit isigineqarpoq. Taamaattorli tamanna timigissartarfinnut fitnessertarfinnullu Kalaallit Nunaanni Anti Doping-mut sullissinermut isumaqatigiissutitut kiisalu allagartalersuinernut aningaasartuutaanerusussaasoq ataatsimiititaliamit maluginiarneqarpoq. Timigissartarfiit fitnessertarfiillu piginnittut Anti Doping Kalaallit Nunaannik suleqateqarnissamut kajumissusaannut aningaasartuutit taakku ajoqutaassanngitsut ataatsimiititaliamit neriutigineqarpoq.

6.6 Kultureqarnermut inatsit, eqqumiitsuliornermut inatsit kiisalu timersornermut inatsit pillugit naggataarutaasumik oqaaseqaatit

Kultureqarnermut inatsimmi suliassa qarfiit ilaat sunngiffimmik ingerlatsinermi timersornermut tunngasunik ilaqarmata sunngiffimmi ingerlatsinermut inatsisinik atuinermi kultureqarnermut inatsitip aamma timersornermut inatsitip ataatsikkut ator neqarnissaat pisariaqassaaq. Ataatsimiititaliallu isumaa malillugu tamanna aamma atuutissaaq eqqumiitvsuliornermut kultureqarnermullu suliassa qarfinni.

Suliassa qarfinni taakkununga inatsisinik atuneq ataatsimiititaliamit malinnaaffigineqalersaarpoq. Taamaaliornikkut kommunit, eqqumiitsuliornermut, timersortartut kiisalu inuttaasut sinnerisa inatsisinik taakkununga pingasunik atuinerat kiisalu inatsisitigut immikkoortinneqartunik atuneq ataatsimiititaliamit malinnaaffigineqarniarpoq. Taamaalillunilu inatsisit taakku pingasut ingerlaavartumik naliliiffigineqartarnissaannik Naalakkersuisunut kaammattuutini ataatsimiititaliap uteqqissavaa, tak. immikkoortoq 6.2.

7. Siunnersuutit aningaasatigut kingunissaat

7.1 Kultureqarnermut inatsit immikkut

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini allanneqarsimapput. Tassani allassimavoq siunnersuut aningaasaqarnikkut allaffissornikkullu pisortanut, inuussutissarsiornermut innuttaasunulluunniit aningaasatigut kinguneqassanngitsoq.

Sunngiffimmi atuartitsinermut akiliuteqarnissamik pisussaaffik kultureqarnermut aamma sunngiffimmik ingerlatsinermut Inatsisartut peqqussutaanni nr. 10-mi, 2002-meersumi § 16-mi allassimasoq atorunnaarsinneqassasoq kultureqarnermut inatsit aqutigalugu Naalakkersuisut siunnersuutigaa. Taarsiullugu kommunit sunngiffimmi atuartitsinermut akiliisitsinissamut taamaallaat periarfissaqassapput, tak. kultureqarnermut inatsimmi § 19, imm. 1. Inatsisissatut siunnersuutip aningaasatigut kinguneqarnerlunnissaanik Naalakkersuisut naatsorsuutiginninnginnerat tunngavigalugu ataatsimiititaliamit inernilunneqartoq kommunit siunissami sunngiffimmi atuartitsinermut akiliuteqartoqartarnissaanik piumasaqateqartarnerminnik allannguilersaannginnerat Naalakkerusisunit ilimagineqartoq.

Kultureqarnermut inatsit aqutigalugu Naalackersuisut aalajangersakkanik erseqqissunik pilersitsiniarnerat aqutsinikkut allaffissornikkullu innuttaasunut arlalinnik pitsaaquteqartoq Naalackersuisunit oqaatigineqarpoq. Tamatuma qularutiginissaanut ataatsimiititaliaq pissutissaqarsorinngilaq. Akerlianik sapinngisamik paasiuminartunik ersarinnerissunik eqqornerusunillu aalajangersaliornissamik siunertaqarnek ataatsimiititaliamit tapersorsorneqarmat oqaatigineqassaaq.

7.2 Eqqumiitsuliornermut inatsit immikkut

Siunnersuutip piviusunnigortinneqarnerani aningaasatigut kingunerisassat siunnersuummut nalinginnaasumik nassuiaatini allanneqarsimapput. Tassani allassimavoq siunnersuut aningaasaqarnikkut allaffissornikkullu pisortanut inuussutissarsiortunullu aningaasatigut kinguneqassanngitsoq, tassa tamatumani pineqarmat aalajangersakkanik manna tikillugu atuuttunik ingerlatitseqqinneq aammalu periusioreersut maleruagassiorneqarnerat. Naatsorsuutigineqarpoq innuttaasunut ersarinnerusunik tunngavissaqartitsilernerme siunnersuut pitsaasumik kinguneqassasoq. Tamatuma qularutiginissaanut ataatsimiititaliaq pissutissaqarsorinngilaq.

7.3 Timersornermut inatsit immikkut

Siunnersuutip piviusunnigortinneqarnerani aningaasatigut kingunerisassat siunnersuummut nalinginnaasumik nassuiaatini allanneqarsimapput. Tassani allassimavoq aalajangersakkat pisortanut oqartussanut pisussaaffiliisut pillugit pissutsit ima allannigortinneqanngitsut amerlanerusunik aningaasaliissuteqartoqartariaqarluni, tamatumani timersornermut aningaasaliissutaareersut pingaarnersiorlugit tulleriiariffigineqarnerat pineqarluni. Tamatuma qularutiginissaanut ataatsimiititaliaq pissutissaqarsorinngilaq. Tamatuma saniatigut Kalaallit nunaani Anti Doping aalajangiisartutut ataatsimiititaliamik aamma nakorsaatinik pissassartarnermut akiuinarluni Kalaallit Nunaanni arlaannaanulluunniit attaveqanngitsumik aalajangiisartutut ataatsimiititaliamik pilersitsineq aalajangiisartutut ataatsimiititaliani ilaasortat aningaasarsiaqartitaanerannut aalajangiisartutullu ataatsimiititaliat inatsisitigut pisussaaffigalugit suliassaminik isumaginninnissaannut aningaasartuuteqarnermik nassataqassaaq. Aningaasartuutissat siunnersuummut nalinginnaasumik nassuiaatini allanneqarsimapput, tamatumalu oqaaseqarfiginissaanut ataatsimiititaliaq pissutissaqarsorinngilaq.

Kalaallit Nunaanni Anti Doping pilersinneqarnerani timigissartarfiit fitnessertarfiillu namminersortut suleqatiginiarneqarput. Tamanna aningaasatigut kinguneqassaaq, tassa Anti Doping Kalaallit Nunaat sullissinissamat isumaqatigiissutit naapertorlugu akileqqusissuteqarnissamat siunnersuutikkut tunngavissinneqarmat. Sullissinernut taakkununga akiliutit qanoq annertussuseqartinneqarnissaat inatsisissatut siunnersuummi nalunaarneqarsimanngilaq. Tamatuma saniatigut timigissartarfiit fitnessertarfiillu taakku suleqatigiinneq qulaani taaneqartoq pillugu allagartalersuinerneq aningaasartuuteqarnissaat naatsorsuutigineqarpoq.

Inuttaasunut tunngatillugu timersornermi ersarinnerusumik inuttaasut tunngavissaqalernissaat naatsorsuutigineqarpoq. Tamatumuma saniatigut Kalaallit Nunaanni Anti Dopingip aamma nakorsaatinik pissassartarnermut akiuinialuni Kalaallit Nunaanni aalajangiisartutut ataatsimiititaliap malittarisassai naapertorlugit inuttaasut pisinnaatitaaffi qulakkeerneqarput.

8. Ataatsimiititaliap innassuteqaatai

8.1 UPA2016/116 – Kultureqarnermut inatsit

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititalia **isumagatigiittup** tamanna tunngavigalugu siunnersuut akuerineqartussanngorlugu inassuteqaatigaa.

8.2 UPA2016/163 – Eqqumiitsuliornermut inatsit

Naalakkersuisut allannguutissatut siunnersuutaaat akuerineqassasoq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap **isumaqatigiittup** inassutigaa.

8.3 UPA2016/117 – Timersornermut inatsit

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititalia **isumagatigiittup** tamanna tunngavigalugu siunnersuut akuerineqartussanngorlugu inassuteqaatigaa.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliamit aappassaannigassanngortinneqarpoq.

Vivian Motzfeldt,
Siulittaasoq

Peter Olsen, Siulittaasup
tullia

Suka K. Frederiksen

Poul Hansen

Mimi Karlsen